

ԿԻՐԻԿԻԱՆ ՀԱՅԱՍՏԱՆԻ ՈՍԿԵՐԱՄ ՊԵՏԱԿԱՆ ԷՐՄԻՏԱԺՈՒՄ

Խ. Ա. ՄՈՒՇԵՂՅԱՆ

Կիրիկիայի հայկական պետականության ոսկյա դրամները հազվագյուտ են: Ի տարբերություն մինչև օրս հազարներով մեզ հասած արծաթյա ու պղնձյա կիրիկյան դրամների, ոսկյա հայատառ կիրիկյան դրամները հայտնի են միայն մի քանի նմուշներով: Այդ տեսակետից էլ յուրաքանչյուր նորագյուտ հին հայկական ոսկյա դրամ դրամագիտական որոշակի հետաքրքրություն ունի:


1964 թ. ձմռանը Լենինգրադում մենք ծանոթացանք Պետական էրմիտաժում պահվող հայկական հին ու միջնադարյան դրամների հետ: Պարզվեց, որ էրմիտաժի դրամագիտության բաժնում, Ռուբինյան թագավորության դրամների շարքում պահվում է մեկ հատ հայատառ ոսկյա դրամ, որի գոյության մասին մինչև օրս ոչ մի տեղեկություն չի հրապարակվել:

Ոսկյա այս դրամը թողարկված է Կիրիկիայի հայկական թագավորության հիմնադիր Լևոն Մեծի (1199—1219) իշխանության տարիներին, հետևյալ պատկերատիպով.

Ա. կողմ. կետավոր շրջագծի մեջ պատկերված է թագավորը, հանդիպահայաց, բազմած առյուծազարդ գահին, գլխին պսակ, հագին պատմունան, ձախ ձեռքով բռնել է շուշանաձև գայիսոն, իսկ աջով՝ խաչ: Խորագիրը՝ + ԼՆԻՆ ԹԱԳԱԽՈՐ ՀԱՅՈՑ, եզերքում կետավոր շրջագիծ:

Բ. կողմ. կենտրոնում, կետավոր շրջագծի մեջ երկթևանի խաչ, կանգնեցված երկու առյուծների միջև, որոնք իրար են նայում մեջք-մեջքի տված: Խորագիրը՝ + ԿԱՐՈՂՈՒԹԲՆ ԱՍՏՈՒԾՈ. այս ամենը, ինչպես առաջին կողմում, եզերքից շրջված է կետավոր շրջագծի մեջ:

Դրամի տրամագիծը 24 մմ է, կշիռը՝ 6,90 գրամ, պահվում է Պետական էրմիտաժի արևելյան դրամների շարքում (N 5154):



Դրամի Ա կողմի խորագրում «ԹԱԳԱԽՈՐ» բառի մեջ երկրորդ Ա գիրը ունի Ս ձևը, որը հաջորդ Ի գրի միջև վերևում նշված է մի փոքրիկ կետ: Բ կողմում «ԱՍՏՈՒԾՈ» բառի մեջ Ո և Ի տառերը ներկայացված են մենագրի ձևով: Դրամի ընդհանուր պատկերատիպը, գրության ոճը, դրվագման տեխնիկան, ինչպես նաև ոսկու բաղադրությունը, կշիռը, տրամագծային չափը խոսում են նրա վավերականության մասին:

Հայկական ոսկեդրամի էրմիտաժյան այս օրինակը նման է Վենետիկի (Ս. Ղազար)¹ և Վիեննայի² Մխիթարյան թանգարանների, ինչպես նաև Փարիզի³ (Bibliothèque Nationale) ու տիկին Ն. Գափամաճյանի ժողովածուներում պահվող Կիրիկիայի Ռուբինյան հարստության Լևոն Մեծի

1 Ղ և ո ն դ Մ. Ա լ ի շ ա ն, Սիսուան, Վենետիկ, 1885, էջ 381:

2 Հ. Կ ղ ե մ ե ս, Վ. Ս ի պ ի լ յ ա ն, Դասավորություն Ռուբինեան դրամոց, Վիեննա, 1894, էջ 7, պատկեր 3:

3 Ջ ա Ր Ե Հ Պ. Պ տ ու կ յ ա ն, Կիրիկեան Հայաստանի դրամները, Վիեննա, 1963, աղյուսակ 1, պատկեր 6, էջ 77, 130:

երկառյուծ տիպի ոսկեղրամներին⁴։ Պրոֆեսոր Զարեհ Պ. Պտուկյանը իր մեծարժեք աշխատության մեջ ներկայացրել է այժմ առկա ընդհանուր թվով տասը հայատառ կիլիկյան ոսկյա դրամներ⁵, բացառությամբ էրմիտաժյան օրինակի։ Դրանք վերաբերում են հետևյալ թագավորներին՝

Լևոն Մեծ (1199—1219) 6 հատ

Հեթում Ա (1236—1270) 2 հատ

Կոստանդին Ա (1298—1299) 2 հատ

Ընդամենը 10 հատ

Լևոն Մեծ թագավորի երկառյուծ ոսկեղրամի՝ մեր նկարագրած էրմիտաժյան (Լենինգրադի) օրինակը արդեն մեկ միավորով գալիս է ավելացնելու պատմական այդ նշխարների թիվը։ Տարաբախտաբար, մենք չկարողացանք իմանալ, թե որտեղից, ե՞րբ և ո՞ւմ միջոցով է այս ոսկեղրամը հասել Ռուսաստան և իր հանգրվանը գտել Պետական էրմիտաժում։

Միակ մարդը, որի խնամքին ու պահպանությանը երկար տարիներ հանձնված է եղել այս ոսկեղրամը, հանդիսացել է էրմիտաժի «Արևելյան երկրների պատմության բաժնի» ավանդապահ Աննա Սուլթան-շահը։ Հատուկ արձանագրությամբ (№ 43) հայատառ այդ ոսկյա դրամը, ոսկյա 16 ուրիշ արևելյան դրամների հետ միասին, որպես էրմիտաժի «Արևելյան բաժնում» անցյալից մնացած և չգրանցված ժառանգություն, պաշտոնապես հանձնվել են նույն հիմնարկի «Դրամադիտության բաժնին» (№ 583/962)⁶։

4 Պրոֆեսոր Զ. Պտուկյանը, լուսանկարի միջոցով ծանոթանալով Լևոն Մեծի երկառյուծ ոսկեղրամի էրմիտաժյան օրինակի հետ, նամակով մեզ հայտնեց, որ վերջինս ելած է այն կնիքներից, որոնցով դրվագծված են Փարիզի ազգային մատենադարանում, Վիեննայի Մխիթարյան թանգարանում և տկ. Ն. Գափամաճյանի (Փարիզ) ժողովածուներում ներկայումս պահվող Լևոն Մեծի նույնանման (երկառյուծ) ոսկեղրամները։ Մասնագիտական այս դիտողության համար հայտնում ենք մեր շնորհակալությունը Զ. Պտուկյանին։

5 Նույն տեղում, էջ 74—83։ Այդ տասը ոսկյա հայկական դրամներից մեկը (Կոստանդին Ա թագավորի ոսկյա դրամի երկրորդ օրինակը) հայտնաբերվեց 1958 թ. Զ. Պ. Պտուկյանի կողմից Կ. Պոլսի թանգարանում։ Դրա մասին նույնպես դրական հիշատակում չի եղել անցյալում։

6 Հեղինակը իր շնորհակալությունն է հայտնում էրմիտաժի գրամագիտական բաժնի վարիչ պրոֆեսոր Ա. Ա. Բիկովին՝ սույն դրամը հրապարակման տրամսդրելու և մասնագիտական խորհուրդների համար։